

四庫全書

集部

欽定四庫全書

強齋集卷八

明 殷奎 撰

詩

自警

生平為學苦多歧一寸靈臺尚可持肯向二三頻致察  
何須五十始知非行藏莫昧乘機速仁義無妨見效遲  
靜裏工夫難著力儘教動處與防微

醴泉丞楚君汝桓以其先文靖公寶臣先生寄  
沛令詩墨蹟見示益從政之格言也今之仕者  
由之足為良吏矣奎方為童子師無事於政謹  
用其韻賦此自警因寫寄崑學諸賢友庶得就  
正于傳士潛夫先生云

十二月七日回自府城待渡河南

羈心向晚倍淒清立馬沙頭遠思生  
爭渡車牛留兩岸  
候人燈火出中城  
河冰東合魚書杳  
山靄南分鴈字橫

歲律忽忽行欲盡眼穿雲海不勝情

奎倚席涓城校室伏承耕學袁公雪樵秦公二先  
生遠自故里寄惠新詩教詔之誼睽離之情倍溢  
乎辭捧誦再四感愧交并不能已已既次嚴韻屬  
和奉懷因興起豐城雲門河南公武潛夫諸先生  
例借前韻各成一首以見區區向往之私至於落  
句羸瀛互用亦足明僕於二先生無少偏黨也

木魚橋下城南路三十年來往復情夢寐隱居高晚節

綢繆姻好仰平生子雲奇字人稀識東野新詩孰使鳴  
無計即歸陪第語行藏聊復任黔羸 右答耕學

淮海題詩說老成遠將闕輔慰愁情危機重嘆吳三陸  
開迹難招魯兩生皎皎白駒誰復繫嚶嚶黃鳥自相鳴  
橘林亭子垂霜實翹首仙凡隔鳳瀛 右答雪樵

儒臺疇昔起豐城宿望遙欽鎮物情風節千年徐孺子  
淵源一代揭先生江關暮夜憐烏巾身世行藏看鳳鳴  
投老文鋒渾叟鏢裹糧三日尚能羸 右豐城

經術傳家擅代名著書滿屋見高情楚王爭事浮丘伯  
漢主方求老伏生千仞雲門青壁峻一陂秋水玉琴鳴  
崑丘臺上虹垂月髣髴蓬山在大瀛 右雲門

古塘烟雨暮潮平室遠人深疊恨情海上珊瑚曾倚釣  
船頭笊箸解全生冥鴻刷羽秋孤奮老驥垂頭夜一鳴  
前史近應重校勘不教趙姓混秦嬴 右河南

鹿城茅屋好風清千首文章萬古情江外暮雲寒不動  
池頭春草夜仍生圖經筆削權衡見篆籀風流劔戟鳴

少小羨君為古學而今高處到姬嬴 右公武

每憶荊州人物論如君所敬是吾情月明蟋蟀秋相俟  
霜重薰葭水未生鞞琫佩刀金錯落和鸞在式玉鏘鳴  
從容名教無窮樂何必遙尋海外瀛 右潛夫

次韻雪樵先生去歲臘月見懷之作

久客渾愁劇那堪歲暮時失羣憐鴈斷歸計怕鷓遲老  
樹秋風咽空梁漢月垂喚回今夕夢和去舊年詩

倚席猶無地登瀛豈有時繁華都去盡游宦獨來遲親

養愁長阻朋情荷遠垂鄉音誰是伴吟斷寄來詩

次韻長通見寄二絕句

兩屐常時過曲亭小牕風雨夜談經緇塵眯目愁漂泊  
夢裏雲山只暫青

本無竒特誇修榦澗自支離語大年封殖正煩君子在  
歲寒終擬見蒼然

寄睢州盧別駕

我愛睢州好弟兄不同出處却同情著書滿屋心偏苦



自  
卷八  
佐政專城迹併清徐錯又從江左見賈生難擅洛陽名  
月明千里遙相憶懷抱何由得盡傾

寄次泉

渺渺予懷淝水東故人祇憶傅丞公科名聊復從先志  
宦學端能守素風湖曲酒船應獨棹雲門布襪與誰同  
南歸擬約盧鴻一晚飯舵樓山色中

寄麟游危丞

為政山城再涉冬羨君高致每從容揮絃避暑宮前月

覓句仙游觀裏松長厚固應推密令驕矜莫謾議元龍  
好情滿擬相傾瀉少待春風發興濃

贈武功邢明府之翰余簿公至父蕙東李贊府崇  
業

武功千載紀佳名地望猶堪冠列城古廟卽封尊后稷  
空墳漢節表蘇卿凋殘里社流移復文采官寮撫字并  
太史行修循吏傳可容卓魯擅英聲

伏承陝省卜架閣以騰粥稻米相餽麟游危贊府

亦寄鹿脯到齋賦此叙謝

客身無伴久淒涼節物勞人遠送將  
鮮給野麋兼臠髓粥分香稻雜餼餽  
嘉平莫問鄉風舊清祀空慙世澤長  
薄宦不歸芳歲晚倚樓一望又斜陽

臘日有懷陳侍郎則項郎中駕秦御史曷陳御史  
增夏御史時

臘日晴原感慨長斯民休息荷時康  
十禽物盛餘三殺八蜡年豐達萬方  
分粥鄰人憐舊俗賜脂朝士羨恩光

舉頭南北雲泥隔為寫新詩託鴈行

除夕戲簡萬丞

除夕忽忽到客邊客懷渾不似當年一身謬翦宜春綵  
兩度遙違守歲筵詩叟愁吟蛇赴壑酒仙渴走馬跑泉  
歸來有喜君知否瑞雪飛天滿大田

除夜

客身兩度逢除夕白髮添來知幾莖想得故園諸弟姪  
擁爐膝下話寒更

正旦公燕有懷二弟

一縣衣冠共祝天  
禮成為慶秩初筵  
身慙重客居人右  
心憶慈親墮爾前  
春酒百壺空漱滌  
清歌雙舞漫嬋娟  
遙憐二仲高堂上  
綵服承顏似昔年

立春日口占

愁日逢春日吟身是病身  
都忘鄉俗舊轉覺老懷新  
問舍求田歲婚男嫁女  
辰共誰論此事俛首對傍人

雪晴絕句

春到江南更好看  
手提譚麈拂南冠  
一庭雪水清如許  
石鼎誰烹小鳳團

贈夏臻

終南山色亦佳哉  
野鶴孤雲處處來  
子夏小冠親手製  
許生寬褐稱身裁  
淮南桂樹何年別  
溪北梅花幾度開  
歸去草堂流水在  
不堪清淺問蓬萊

酬之翰惠布

遠贈知君憐  
縷藍裁縫自顧亦何堪  
東來韋帶渾相稱

立傍狐裘政未慙潔白儘教欺雪皚淡紅無用費春蠶  
此身真是長安客惟有儒冠尚自南

登長陵

北風吹日下長陵烏帽歌傾與客登幽事尋來幾兩屐  
吟身扶得一枝藤圖經考訂嗟承誤祀典流傳感廢興  
黃土一杯誰復禁空遺翁仲立峻嶒

陽陵

恭儉相仍自足稱路人猶解指陽陵河間不立膠東立

禮樂千年尚未興

懷鄉中諸故舊

生平意氣湧相親零落而今有幾人  
慧聚山房春酒碧  
舊遊回首重沾巾

昨蒙仲弘贊府招預新酒河魚之會  
筵重席疊不  
勝盃酌而歸慙媿之餘賦此為謝

春去愁來思不堪  
賓筵日日剩餘酣  
食魚頓覺河魴美  
煮酒初分甕蟻甘  
紅荔拈春憐杜曲  
青梅對景憶江南



客懷易向尊前醉禮數雖寬益自慙

新堂

狀元坊裏作新堂誰識先生樂意長清渭西來充泮水  
南山東繞作官墻

民謠

耳邊十載聒干戈愁死愁生兩鬢皤昨日縣中人報道  
新開學館著絃歌

縣中學館喜新開抱取兒孫去看來正值縣官行禮日

雍容揖讓列尊壘

縣官揖讓坐橫堂專為朝家育俊良歸去我兒須記取  
門前有箇狀元坊

題畢原莊

畢原高處北山前喬木參天幾百年隱德相傳者舊遠  
素風不改子孫賢李生方欲歸盤谷摩詰還能寫輞川  
昭代需才心正渴可容問舍與求田

哭道原

少小交游廿載餘  
往來門巷幾曾虛  
夕陽淚洒鄰人遂  
何處而今覓舊居

涉水

灞澗交流縱復橫  
醉馱驢背任歌傾  
風前似蹋天池翼  
月下如騎采石鯨  
何處蘭舟相蕩漾  
誰家羅鞵闌輕盈  
總輸八月仙槎上  
濯足銀河萬里行

寄吳宗德明府

寂寂先生一草堂  
東山卧穩北牕涼  
消閒題鳳過溪墅

扶病聽鶯傍苑墻恨我歸期成蹭蹬向君離思轉徬徨  
黃花籬落秋深處準擬相過醉十觴

寄公暨盧同知

一代文儒新宦業百年孝友舊家風鄉閭物論皆無間  
州縣人才孰與同貧乏喜傳消息好頌謠難買是非公  
題詩為賀兼相勸儘使男兒志氣雄

禱雨有應題贈縣中令佐

春田處處耕難入宿麥蘄蘄秀未齊縣裏官僚憂旱燠

隴頭黎庶望雲霓香烟謁廟攜雙袖甘雨隨車過一犁  
兩履莫嫌趨賀晚上街滑滑怕青泥

寄弟

故園二仲近何如半載平安未得書堂下紫荆長幾許  
墻陰翠竹勝當初時常官府供徭役旦日庭幃問起居  
媿我飄蓬歸已緩不知歸計尚全疎

寄楚汝桓縣丞

秋滿長安郭偏憐一故人松庭公事少蘭闕檄書新暫

董慌官役猶羈倦客身斯文心獨渴永日候車塵

寄俞仲詳都司卜師顏架閣

郎官聯省寺對詠溢高情日出南山紫風來北榭清  
譚  
玄便玉塵舉白快金莖吏隱今如此誰為後世名

次韻俞都司咸陽晚眺

渭水西風草樹涼郎官瘦馬立斜陽鬪雞下社心空在  
逐鹿中原恨獨長黃土一杯增感慨青山幾度閱興亡  
又聞杖杜歌新調迎勞元戎闕岡

夢回

萬里家鄉半三秋  
信息稀  
心情春已去  
魂夢夜空歸

秋祀長陵齋宿作

縣寮嚴祀事  
襪被出東城  
薄暮炎歎靜  
高天象緯明  
漢陵秋草暗  
秦樹露蟬鳴  
俛仰千年下  
那堪客思生

祀回

七陵秋祀罷  
一騎雨中歸  
候火明孤館  
涼風洒客衣  
草蟲聲轉急  
巢燕意多違  
為託思鄉夢  
南雲白處飛

次韻耀州陳九成同知見贈

新詩留贈信能文  
交臂歸來恨失君  
未遂笑談申繾綣  
徒勞魂夢走繽紛  
平生事契他年話  
為政風流此日聞  
翹首華原秋色裏  
好分一榻寄孤雲

枕流館夜題

千年積雨漲河流  
一派秋聲到枕頭  
兩耳洗來無一事  
不應猶有故園愁

古城田



僕子中夜起將牛耕古城古城古人築古城今人耕古  
人誰復在古城今人平黃蒿上莽蒼白骨下縱橫傷哉  
功築日戰守煩戈兵誰知千載下耕遍無人爭

別永壽孟明府

急雨涼風一院秋五更歸思逐東流不堪又與君為別  
萬里乾坤獨自愁

中秋

年年今夜月雙影照西樓今夜流雲亂天應亦解愁

閨思

萬里音書隔歸期  
日夜猜沙頭一鴈下  
可是渭川來

贈衛武孟

成縣丞名洪文  
節公五世孫也

桑海茫茫不可論  
衣冠鄉里幾家存  
咸陽渡口秋風裏  
驚見開禧執政孫

王事賢勞可得聞  
貢來官馬動成羣  
身先牧圉關山險  
膽敵將軍戰伐勛

栗亭薯蕷耕雲熟  
同谷黃精斲雪深  
恐有詩人在山野

使還為我一相尋

登西安府鼓樓

西府層樓接上台客懷落日為誰開一天秋色雲飛斷  
萬戶晴暉鵲噪來遍倚危闌頻入感未吹畫角已興哀  
千年朝市仍更變獨有南山石未灰

送徐采大

布衣三載長安客一日公車趣召來駐馬已無官柳在  
聽鶯莫待苑花開賢名久慕東州彥王佐方需季世才

病骨支離媿無用白雲歸路漫徘徊

贈趙子常

西夏往來遷子去量移今喜在長安  
夢魂尚悸關河險足力應諳道路難  
定見相如歸趙壁不妨鍾子著南冠  
春風擬作還鄉伴花滿吳宮得共看

十月朔旦枕上偶成

三千里外未歸人四五旬來半病身  
莫問男婚并女嫁須知親老又家貧  
田園幾處荒蕪盡墳墓何人拜掃新

渭水無情過門去也能嗚咽助悲辛

重登長安鼓樓

秋半長安特地寒西風不管客衣單  
晚晴貪看南山色百尺危樓獨倚闌

移咸陽圖入學

翠石鵠圖在學前鋒稜利缺已多年  
諸人棄去渾堪惜茂宰移來也自賢  
百里從遷新井邑五陵不改舊山川  
明朝打去街頭賣勝種西泉二畝田

述懷次郝宰韻

鏡裏頻看白髮生，一身三歲離南京。  
力辭敢謂官非貴，自顧深慙學未成。  
亦欲匡時希董仲，不將稽古羨桓榮。  
支離留得殘形在，尊酒無人獨自傾。

伏承士景明府增廣學舍招致生徒借韻叙謝

學舍增修事董生坊門重立表馮京

學東有狀元坊為楊軛設

遠朋

已喜牽聯至善政，還看次第成。  
莫笑人情相冷淡，要知天爵最尊榮。  
斯文千載真吾事，此日於君意盡傾。

渭陵

炎精八葉已中衰  
千載荒陵竟屬誰  
寢殿有垣悲躑躅  
苑門無地覓罽毼  
祥開沙麓溝中絕  
禍變堦墀土未夷  
颯颯涼風吹客鬢  
不堪興感立多時

九日武功余簿書來見索拙作仍惠雙筆口占二  
絕句答之

西風破帽不禁吹  
默默愁情祇自知  
多荷故人相問訊  
錦囊羞澁已多時

雙筆慙懃慰所思染來還寫寄君詩  
空花不作癡人夢  
銀管猶為感德期

憶母

底事別離苦忽當貧賤年  
晨昏三載隔夢寐五更連  
老淚寒燈下愁容暗鏡前  
此寃無乃酷馬得問高天

次韻金德儒秋懷

隻影飄蕭渭水頭涼風白鴈一天秋  
秦雲未改南山色  
漢月空涵故國愁  
萬古勛名隨野馬  
百年心事付沙鷗



後生莫漫誇形勝輿地而今混九州

青山纔見便低頭  
沉復頻傷宋玉秋  
萬戶新霜添客況  
一窓涼月伴人愁  
扶搖敢附雲間翼  
浩蕩思隨海上鷗  
忽得君詩還喜劇  
猶疑老杜在鄜州

送古季初主簿之永壽兼簡孟賓知縣丁仁卿縣丞

客裏難持送客盃  
愁腸幾度為君開  
特科方重詞章選  
小試應多簿領才  
兔窟擊鮮山雪盛  
蜂房割蜜縣花開

官僚轉覺麻亭好談笑何時許一陪

送宜川劉知縣赴都

世科憐繼美出宰重宜川  
陶穴流迤復邊城謠頌傳  
一雙王令烏五鼓鄭侯船  
目送南雲晚題詩為惘然

送朱子方之永壽訪孟明府

十二街頭雪未消  
蹇驢馱醉影飄蕭  
憑君說向麻亭尹  
如此踈頑可見招

小車渡淺水流烟  
更上長船望碧天  
有興欲尋安道去

秦原高處不通川

鄴簿表魯瞻見訪

下馬敲門月色新  
語音遙認是鄉人  
馳驅王事賢勞日  
問訊吾徒寂寞濱  
白飯可能淹駢從  
青燈空復伴吟身  
平生鄴杜佳山水  
便欲同游第一春

次韻邢之翰南行留別

人事那堪定身謀  
政自艱向隅憐一慟  
滿座輟羣歡鳩  
快却籠放魚矜漢  
網寬妻孥誰是寄  
早早報平安

一旦膺蕭律三時守楚閩窮愁闕月淡幽憤海天昏紀  
詠傷前事歸耕幾後恩柳州才豈拙無用問天孫

立春日與瞿允同縣宰飲酒

故人昨日故鄉來春日今朝春酒開鮭菜新盤還飮飯  
鶯花舊夢重徘徊情知老至拋書冊怕見容衰掩鏡臺  
子起為吾歌骯髒出門一笑謾憐才

送唐彥博縣宰朝京

去思此日盈汧隴試問同年得似無萬里關河攜一鶴

五城樓觀躡雙鳧封書客裏春仍寄別酒沙頭晚更沽  
江上故人如問我為言歸思滿江湖

除夕俞玄善同宿

牢落歲除辰那堪是客身娛親三載缺入夜百憂新連  
榻思歸伴殘燈未睡人相看無一語獨有淚盈巾

新年

故園弟妹拜新年應望咸陽一點然西縣東城南北第  
阿孃今日在誰邊

遊睢村寺觀楊太妃墓誌

騎驢上厓去去到睢村寺空院一僧居荒榛幾人至片  
石卧山門上有唐朝字知是武家墳咸亨歲中誌王禮  
墓已厚戚苑恩更異尊號換穹碑園陵易新制誰知發  
掘餘此石猶在世摩挲一俛仰咄彼千載事夕陽歸去  
來渭水方東逝

順陵獨遊

順陵山下客來稀野草荒荒日色微走穴黃狐窺我過

鷲塲彩雉背人飛，厚藏自古多為累。  
僭制終唐竟莫非，讀罷穹碑吾亦愧。  
道傍拂袖一歔歔。

西原遊望

層原橫百里，一望五陵空。  
雲過山城黑，風來野燒紅。  
吟身驢子上，歸思鴈行東。  
薄暮沙塵起，令人嘆轉蓬。

答鞏昌諸縣枉顧不值

空煩車馬扣雲關，不是先生不得閒。  
為報今朝有幽興，半醒半醉去遊山。

別歲

一番來咸陽三與芳歲別四方數萬里行役何時歇百  
年要有盡能得幾時節而況已過半遠道何由徹愁來  
不成寐耿耿到明發乾艾匪他求魚網當退結秣我櫪  
上騅膏我車上轄努力遵往軌無為徒愒愒

原上早春

咸陽原上春冥冥南山北山相對青山如逆旅鎮長在  
百年過客無時停高低岡坂縱橫道今墳古墓知多少



年年來往換新人恰似春風原上草草枯只是一年期  
人墓終無出土時貴賤賢愚同一盡何用空名萬古垂  
侯叔庸同行過其故居見迎春一株

野花一株何人栽欲開未開迎春來主人歸來花欲語  
欲語不語令人哀往年看花年正少花前把酒花長笑  
妻能歌舞妾能彈門外催租無吏到二十年來院落空  
兔葵燕麥競為容牆角一叢憔悴煞年年無主泣東風  
今日歸來君不住君今又向何州去上林騎馬聽鶯時

慎勿長忘故園樹

二月七日省牲諸陵沿道雜賦五首

一樹殘花媚曉暉  
淡香偏襲旅人衣  
春風落盡東園雪  
三載江南未得歸

昔日平陵賣酒家  
冰槽春色夜能賒  
而今酒盡遊人散  
零落空垣一樹華

景帝陵前野草花  
也曾沾被舊繁華  
只今開遍無人管  
付與牛羊臥日斜

野老門前社樹青  
社公無酒眼醒醒  
春泥二月無人上  
盡作城頭築土丁

碧椀分來杏酪香  
風前澆我渴詩腸  
野人今度相辭汝  
立馬題詩又夕陽

長陵曉望

馬上東風生曉寒  
長陵高處望長安  
丘墟散落人才盡  
岡隴分崩王氣殘  
歲祀幾朝修典制  
月遊無廟著衣冠  
山河百戰誰能主  
却屬漁翁一釣竿

題杜處士宅

喬木蒼蒼北杜村百年人物幾家存一枝氣在沖和地  
五世名全孝義門壁上詩章猶未泯碑陰譜牒尚堪論  
不因種德何能爾更擬流風到後昆

寄謝杜德方兼簡劉亭中

百五無家思不聊北莊居士忽相邀石安原上春無限  
杜老堂前酒正饒第二回圓憐月夜不多人醉賞花朝  
臨歧欲覓劉郎別已入丹崖不可招

長安新城

賢王來鎮陝關西增廣都城弗敢稽勢無北苑一繩直  
聲殷南山萬杵齊晴角遠從天漢落春旗平拂斗杓低  
喜看保障如磐石為賦秦風氣似霓

百五

紙錢如雪草如烟百五家家上墓田春去思鄉渾欲老  
愁來歌枕不成眠

施僉憲行部口占奉東

今朝出郭看桑麻載道歌謠事匪誇天上法星初弭節  
人間甘雨已隨車丹書歷歷煩申誠白簡稜稜慣擊邪  
頃使西人談美政儘將光彩耀儒家

陳情一首同呈

曾因才短故辭官還得前時首宿盤病骨支離慙倚席  
客懷牢落強戎冠慈闈老去家貧甚先塋年來水齒殘  
聖主仁深恩例在願推餘潤到荒寒

登白起城見榴花一株

卷八  
城下茨藜十里沙城中無處覓人家瓊英開遍無人賞  
腸斷衰翁對日斜

打碑

炎歊撲面火流雲道路爭迎白練裙借問先生何處去  
睢城寺裏打碑文

沁州碑石漢陵旁地下玄龜殼也藏莫怪摩挲成久立  
書家知是郭謙光

流盃亭石何年破立馬鐫名幾字存契苾墳前崖子上

家雞筆法尚堪論

題胡御史松溪小隱

軒冕山林政不殊，行藏偶爾見規模。  
冠曠有清風在，鶴帳從教夜月孤。  
小隱誰知非大隱，故吾元不異今吾。  
黑頭更上麒麟閣，松菊歸來尚未蕪。

杜曲二絕句

稜稜桑田帶水田，夕陽幽興滿樊川。  
祇疑身在江南處，放我溪頭卷畫船。



金剛山記卷八  
卷八  
青山隔岸水平疇高柳陰陰五月秋旋汲寒泉沉碧李  
橫眠白石漱清流

過廉平章樊川別墅

山水娛人未肯休登臨何事白人頭君看花木樊川墅  
祇有廉泉獨自流

雨後望終南山作

萬嶺千崖紫翠團山城過雨一番看斷雲面面屏風疊  
殘照稜稜劍脊攢華岳三峯晴戴雪草堂六月晝生寒

興來便欲扶筇去無限歸心此際寬

送漢中太守費浩然朝京

公昨漢中初出守劍門猶拒萬夫開郡民驚悸思良吏  
天詔丁寧用秀才形勢百城歸控制流逄十載賴招來  
潁川應有重臨日談笑南樓尚可陪

永壽縣期孟明府未還

秋至物情變雨來山氣涼孤懷客夜永薄宦歸程長  
平泉倦登陟葆峯謾徜徉故人期未至岸幘上高岡

秋社

秋社荒山裏迎龍野廟開豚蹄田父祝鞍馬縣官來

東泉

四山饒雨氣一澗落泉聲此處銷殘暑還同茂宰行

縣齋對雨

八月風氣寒荷衣不堪補南還未成行山館眠秋雨

孟明府古主簿同遊石牛亭

負郭青山似我閒相邀隨意一躋攀路穿疊嶂盤高下

身逐浮雲任往還，誰約武昌遊。退谷自疑柳子賦，囚山  
故林秋色歸來晚。滿擬婆娑數樹間。

聯句

雨晴苔徑滑如飴。孟烏帽簷斜屐齒危。一鳥不鳴秋樹

暗。殷數峯如立晚雲奇。古道傍野老邀相飲，坐上鄉人

別有期。孟泉石也須還我輩。殷丁寧猿鶴莫深疑。古

雨中述懷

久留永壽欲別去，如此滿天風雨何。衣裳山外八月冷。

泥水道上三尺多異鄉交誼足  
繼繼故園歸計成蹉跎  
明朝晴陰未敢必有酒且任朱顏酡

別後重寄永壽諸公

平泉山色翠可食留滯不知歸計  
踈一月客遊風雨半  
百年交契子孫初南郭壺漿秋飲  
餞長亭鞍馬野躊躇  
如此好懷何可別歸來注目重憑虛

登乾陵作

觀闕傾頽石獸殘涼風側帽話長安  
函香不覺天能雨

移檄空憐土未乾，月過三原秋淡淡。  
雲來九峻夜漫漫，誰能喚起裴宮監。  
為說當初創業難。

望昭陵

仰止昭陵莽蒼中，孤峯竒峭插秋空。  
因山政恐勞民力，琢石何須象戰功。  
終見蘭亭歸御府，重聞華袞奠玄宮。  
獨憐陪葬諸臣在，不使春秋祭祀同。

晚泊山家

出郭已廿里，別酒猶未醒。  
野人競遮邀路轉，岩扉靜林

沾踈雨涼山帶秋烟暝借榻未成眠予心方耿耿

次韻題郝士景詩後

伏櫪長鳴意氣生朱衣華髮下瑤京位從列宿圖中見  
名向翹才館裏成古錦囊來空復美碧紗籠去未為榮  
大夫自有登高賦無限丹心此際傾

別南山

朝夕終南望眼親三年欲往竟因循一盃遥與山靈別  
重結平生未了因

出長安作

蹇驢被酒出東關  
陳跡依稀眺望間  
翡翠坡空悲劫火  
鳳凰背在弔囚山  
蕭蕭野樹秋霜落  
寂寂宮花夜月閒  
最是灞陵橋下水  
晚來流出轉潺湲

絕句

灞陵橋下水潺湲  
人影離披夕照間  
來往總憐車馬好  
西風破帽獨南還

臨潼張明甫置酒出所藏前賢墨蹟為翫



僕夫弛擔臨潼縣寒日暉暉卓午時旌儒坑邊來弔古

靈泉觀裏去題詩薦紳談笑時髦集

丘仲山博士黃吉甫助教在坐

飛

烏從游夜漏遲珍重前賢遺墨在為君開卷動遐思

### 鴻門

數家烟火新豐市一望蒿萊戲水河漢祖空憐功業在  
而今與仲不爭多

### 華州道中口占寄示陳丞

少華山前亂石堤大敷橋下白沙溪霜晨顧眄歌貂帽

晴日行吟信馬蹄  
薺麥青青憐舊採  
桑榆歷歷擬幽棲  
舉頭刺眼三峯秀  
縣令應須一借梯

羅敷橋下見雙白鷺

飛來雙白鷺  
雙鳴復雙止  
凝思寥廓天  
弄影清冷水  
子心慕貞潔  
塵網誰相擬  
為爾立斯湏  
況在羅敷里

登灝靈門重望華山

灝靈門上立  
逡巡華岳今朝  
看得真  
巨斧削成天一柱  
高標虧蔽地  
雙輪仙翁舉  
掌能招我  
玉女洗頭將事人

何時塵緣竟了得中峯高處去棲身

潼關送鄒指揮還長安

三載潼關煩出將指揮戎陣靜無譁秋防帳裏陳壺矢  
夜邏山前擁鼓笳漢閣論功名已重秦川在望路非賒  
五橋應有山林在準擬題詩候小車

聞叔御謫濠梁

項叔為郎白首年買牛謫去種濠田書辭皎皎春成夢  
燈影幢幢夜不眠里巷無多交左在班行歷數幾人全

何時破屋秋風裏依舊哦詩棹酒船

次韻洵陽金主簿子厚見懷二首

周南數載為誰留風入貂裘動客愁  
著蕢天寒同谷晚夫容霜老曲江秋  
三吳夢想添新恨萬里歸來覓舊遊  
亦有洵陽高士在共將幽興賦刀頭

悠悠末俗競趨塵落落清才自絕人  
漫與弟兄為祿隱不將簿尉絆吟身  
帽簷山郭衝風側艇子關河載雪新  
慙愧同門相見晚一番傾蓋便相親

潼關留別夢得孟雲子厚希魯諸君子

客裏衣冠喜合并留連三日荷深情華陰縣裏追遊好  
江月亭前發興清碑記延熹充嗜古杖分靈壽得扶傾  
匆匆又上關東道萍聚蓬飄嘆此生

東陳贇府孟雲求靈壽杖

長安倦客始南還足蒯那堪道路艱暫借先生靈壽杖  
明朝扶我過潼關

孟雲贈杖以詩酬之

一枝靈壽落吾手布褐綸巾便不孤林下敢同蒙上賜  
花前絕勝倩人扶朱藤未見來南詔斑竹徒聞贈洛都  
支離病骨君能念消得兒童喚老夫

鞏縣謁宋諸陵

奉先橋下水湯湯俛仰千年一感傷陵樹無根流夕露  
宮花有淚洒秋霜青山鞏固神猶慘白塔錢塘恨更長  
聖代方隆中夏統故應塞北薦馨香

過靖陵

號洛行三日嶽巖歷二陵騎危甘下步虎近怯高登仆  
木崩崖底摧輪亂石層所悲秦晉事踪跡尚堪徵

汜水關上偶題

巖邑區區吝叔封誰知相愛是相攻京雖不度非難克

祭呂何曾識此公

鄭州西門二十里有京水

鴻溝

在滎陽汜水之間兩縣分界之處西去汜水二十里有界首鋪

廣武滎陽戰未休故將局面變鴻溝憑誰說與重瞳子

未是天亡肯信不

廣武山在汜水縣北汜水在虎牢關下六十年前縣為大水所滄移今治

在舊治  
南十里

入新安縣境有懷顧明府

纔入新安趣便真  
縣中官長是詩人  
三年雲路離情隔  
千里月明清夢頻  
粟葉滿山秋實美  
魴魚出水凍腴新  
高齋晝寂便清供  
消受民風一味淳

絕句

風勁虎狼嗥  
盤車石棧高  
潼關趲運急  
不敢更辭勞

題新安驛



地勢奔馳若建瓴，崎嶇千里未能平。  
漢關東啓遺山址，禹澗西來抱縣城。  
探虎墓前聞虎過，學雞臺上聽雞鳴。  
客來自幸清時好，不識喧呼夜點兵。

洛陽

銅駝巷陌草萋萋，金谷園林迹已迷。  
惆悵天津橋上月，更無人聽杜鵑啼。

鄭州道中

甫田萬頃少耕犁，茂草東西一色齊。  
寒日荒荒飛野雉。

晚烟漠漠走山麕

中牟

中牟縣裏駐歸驂  
客路情懷儘自諳  
白草黃沙仍渭北  
斷陂流水已江南

絕句

霜落水禽啼寒流遶大堤  
長魚不受釣躍過石梁西

過睢州哭公暨

儒效時方少君才得暫伸  
大邦多委重別乘著清純  
安

集心恒苦謙虛政自循魂歸千里骨哀動一州民藝圃  
摧芳桂詞源失壯鱗經過流涕橫不獨為姻親

寧陵道中

沙隨道中水流川葛陂渡口有新船有錢便欲買船去  
順流歸到江南邊

睢陽弔古

黃塵下馬睢陽道東帶徘徊弔數公韓李文章今日事  
江淮堡障中興功千年雙廟基何在百戰孤城氣尚雄

寄語河南夏御史願修前典表遺忠

早起題白戰道驛

霜鼓四更轉冰輪三丈懸衝寒又上道憶殺畫船眠

過清流澗

清流染血滑如苔一戰平邊宋祚開關門今日無人守  
驢背詩人雪裏來

龍灣

龍尾灣頭渡長船挂一帆前年北行客今日幾人還

始上吳船

一身客秦隴  
孑孑又南旋  
跋涉五千里  
始上東吳船  
青山盡故舊  
迎我船窓前  
揮手謝之去  
不得相留連  
故林白頭人  
倚門已三年



強齋集卷八

欽定四庫全書

集部

強齋集卷九

十

詳校官庶吉士臣龍廷槐

中書臣劉源溥覆勘

總校官降調編修臣

倉聖脉

校對官檢討臣

李學錦

謄錄監生臣

方步蟾

欽定四庫全書

強齋集卷九

明 殷奎 撰

拾遺

婁侯廟

子布文武才鼎峙非本志伯言社稷臣早定西龕計霸  
功昭吳甸侯封啓婁地何以慰遺民於焉崇祭祀

王御史墓

御史春秋學脫略專門陋見諸行事間大用亦未究氣  
直沮權相憂深曠儲副復墓非為眩所思在耆舊

李侍御墓

李公讀論語探道悟淵微政推守令最名重諫諍司生  
平信跌蕩之死氣不衰表樹限樵牧善政固在茲

劉龍洲祠

改之亦豪邁生世何落落抑鬱過宮書蹭蹬勤王略悲  
歌能無動沉醉信有託新祠薦寒泉九原詎可作



朱節婦塚

元朱虎妻茅氏

節婦當盛年罹此家禍酷逼惡少手夫死身靡辱朝  
論旣旌崇國史復收錄守臣舉墜典持此厲末俗

送張戶部銓選江西

太平天子念遐方典選應推漢署郎星劍倚空開北極  
龍旌照海壓南荒久知郡縣求循吏須信朝廷守舊章  
使節重煩采民瘼遙歸奏對近清光

古樂府煌煌京洛行送施掾史克讓使還京都

白日麗中天帝京何煌煌禁門十二樓複道遙相望瑤  
樹帶靈囿醴泉溢蘭塘殊封建秦虢華胄躡金張冠蓋  
耀里閑車馬隘康莊丈夫四方志萬里覲清光朝從丞  
相騎暮登丞相堂獻納資謨謀致澤躋皇唐眷言善自  
勗今聞如圭璋

古樂府江水一百里送海道千戶殷仲實

江水一百里潮生江欲平離情付潮水相送到吳城  
江水一百里行行復采蓮蓮根共連葉不礙使君船

江水一百里蒲帆阿那移相思若流水那復有窮時

顧玉山金粟塚秋宴集

艱時阻良覲故人成遠別始登金粟塚仰見端正月  
舊遊獨徘徊桂枝重攀折玉盃承夕露翠竹落蒼雪  
賓筵列才彥末至慙獨劣賦詩詎云工庶以慰契濶

題畫

大樹秋霜老新亭落日孤登臨時極目風景未應殊

強齋集卷九

欽定四庫全書

強齋集卷十

附錄

送殷先生叙

氣化之在人朔質南文非聖智孰能通之皇帝受命中  
土聲教之被極於朔南乃命銓曹典教者南北互調著  
為令蓋欲其以質受文以文從質日漸月摩而後風俗  
可一氣化可移嗚呼休哉迺洪武四年吳郡殷先生以

選當為教諭咸陽縣學吳去秦水陸幾數千里先生母  
老子女皆幼衆謂必艱於行而受命之後從容戒行略  
無難色既較求余一言以為別嗚呼道學與時盛衰人  
才由世升降昔宋嘉祐間天下太平二程先生倡明道  
學於河南學者莫不宗之當時橫渠先生亦以道學鳴  
關中關西之人稱之為夫子於是天下知有關洛之學  
及宋運中衰伊川亦沒而龜山載道於南矣自時厥後  
中原文獻不足者幾於百年而有元興於朔方斯時魯

齋先生許文正公實生河南其學有以上承伊洛之源  
於是慨然以道自任嘗攷其蹟以歲甲寅授京兆提學  
關中學者亦翕然宗之如橫渠之於關中於是道學復  
明於北方中原文獻彬彬可考及乎元運復衰關中屢  
罹兵燹文正之學不聞有繼之者以時考之上去文正  
又將百年皇上寵飛文治大舉而先生適當學職於斯  
時以繼文正教化所行之地先生之職文正之職也先  
生之時文正之時也夫豈偶然哉宜先生之行無難色

也且余聞之文正初年南北未通考亭之學無聞焉及從雪齋姚公得南士趙復所傳朱子小學書語孟集註大學中庸章句或問及伊川易傳而後深有默契於中皆手自鈔錄以授學者令其書大行於世若闕地得泉所至則在不以兵燹而廢如文正之時之得之艱先生之教必先之以小學廣之以大學論語孟子而以中庸性命之學成其終庶幾下學上達之功脩已治人之務關中之士將見進於道由是上泝文正之源以求夫橫



渠之學而合乎伊洛之傳則先生之行育材之盛可謂  
樂矣豈獨無難色而已哉如是則風俗可一氣化可移足  
以上答聖天子興文之盛典嗚呼休哉有志之士孰得  
如先生者先生行矣余又聞關中有楊元甫者豪傑之  
士文正之友也韓邦傑劉無競呂伯充者文正之弟子  
也計其子孫必有存者文正淵源之詳先生有徵焉幸  
以寄余洪武四年八月既望雲門獨叟齊邵張紳書

送殷教諭赴咸陽縣序

國制凡府州縣必皆有學學必有官官必以府州縣所薦士然猶必考驗于吏部乃歸而就職焉殷君孝伯崑山人也以古學倡其鄉邦為士人所推服大夫聞之因薦以為縣學教諭君以母老辭強起之既上吏部試春秋義及道統論各一通執政者見之嘉其學欲薦以為守令君辭曰某迂儒職教可也民社之寄重矣然非才不可也既而朝廷以學官準常選例亦南北互調遂調君咸陽縣學教諭咸陽去崑山數千里而遠君還治行

李鄉之人皆惜其官之卑而行之艱也而或獻歎以泣然則余嘗有所望於君者而不在是也乃推君所論道統之意以解之曰聖人之道與天地之化同流也堯舜禹湯之王固各有其地矣湯以後文王周公興於岐周又五百年而孔子作於魯又百年而孟子起於鄒又千數百年而周子程子生於楚張子復生於岐下而會於伊洛之間未幾而朱子出於閩焉夷攷其地則岐周西北也魯與鄒東也伊洛中土也楚其西南而閩又極南

也而天皆生其人焉其由西北而東者相去幾五百年其由東而來在西北在西南在極南者相去又千數百年顧乃希濶若是然其在西北與其在東者先後雖五百餘年而同代數人其在東者百年而有兩人在西北者二千年後同地而復有其人又其自東來千數百年後在西北在西南而會於中土者同時復有數人而其在極南者其人又相續也夫天者之為是也豈無其故哉蓋世運至於周上之而唐虞焉下之而秦漢焉此升

降之會也而文王周公孔子孟子乃先後見其一代之  
間豈非天以道統重周也故地不偏王而其人或王於  
西或素王於東以大是一統歟至有宋而周程張子者  
出千數百年來鬱積之久而闡發之盛豈非天以宋之  
有道也而其人生於西北生於西南而會於中土又以  
大是一統歟宋之南也天下分裂考亭朱子之生不于  
北而于南豈非天以其一人而存中國之道統歟然則  
聖人之道沛焉在天地間由西東北南而假之以其人

發之以其地而不囿於一方者天固使之然也今天子以中國之主統海內外而學官設焉因命南之士典教於北北之士施教於南所以一道德而同風俗也予於是蓋竊思焉自昔元有中國而許文正公以朱子之學佐其主自是南北學者咸知有朱子而朝廷亦以朱子說取士然北方學者於朱子之微言精義猶未若江南君子知之為深蓋朱子之學授之黃文肅公文肅傳之文定何先生文定傳之文憲王先生文安金先生皆南

產也文安當元世猶存顧乃窮而在下其言雖立而未  
能遠被於斯世若猶有所待者固有在於今中國一家  
之日歟君生南方知朱子之傳為有在今而之咸陽焉  
則文王周公聲教本原之地而張子所過化也北方學  
者有能或之先後者焉君其必相與考德問業以要其  
指歸則於國家所以一道德而同風俗者非小補也吾  
聞京兆有蕭維斗先生闕中之學者宗焉今亦有為其  
學者乎比子與修元史獲次其言行寘諸儒學傳中君

而得其學者試以予言而語之其亦有以教我哉洪武  
四年九月一日蜀郡王昇常宗序

送行詩

西上長安跋涉勞三千里外朔風號地連渭水秦川近  
山接終南泰華高故國總消龍虎氣斷碑猶打駱駝膏  
一官莫笑儒林選曾捧琅函覲赭袍

黃菊紫萸秋色新可堪攀折贈離人青袍博士尋常選  
白髮高堂七十親每頌採芹霑聖化載歌行葦仰皇仁



平生故舊今遺幾目送孤鴻度海旻  
淮海秦約

廣文先生行幽獨閉戶窮經住婁曲  
一庭紅葉滿床書  
半畝荒園數間屋秋風籬落菊垂黃  
春雨池塘草生綠  
堂上慈親鶴髮長階前稚子鶉衣禿  
絃歌不輟自春秋  
定省無違謹昏旭先生屢空常宴如  
曳杖吟哦看脩竹  
一朝捧檄入秦關十月驅車走原陸  
三千道路涉風霜  
百二山河壯心目咸陽宮殿草蕭蕭  
渭水園陵秋肅肅  
還聞靈沼多躍魚不見望夷爭指鹿  
祇今天子急賢才

遺逸寧容在岩谷  
沉君麟筆動朝堂  
名在銓曹貌如玉  
一官雖冷道彌尊  
誰謂廣文飯不足  
丈夫平生四方志  
自非燕雀知鴻鵠  
在昔宣尼不到秦  
何幸文翁能化蜀  
古今出處雖不同  
世有英才當樂育  
具陳禮樂開盲聾  
要使閭閻厚風俗  
由來弘道須人為  
今日於君此行卜  
吳舟催發不可留  
颯颯涼風動林木  
對酒何須嘆別離  
但期德業頰相勗  
若到關西有使來  
早寄平安書一幅

豐城余詮

西上西安道路長  
洛陽又復向咸陽  
峻函鴈過天微雪  
灞岸魚肥水若霜  
朝夕望思惟憶母  
春秋講授在尊王  
老子翹首婁江上  
目送雲霄一鷲翔  
河南陸仁

聖代崇文化  
賢良起草萊  
鳳鳴賜谷日  
魚躍禹門雷  
匠石無遺棄  
鴻纖在剗裁  
咸陽秦赤縣  
博士楚宏材  
話別嗟吾老  
橫經羨子才  
渡江淮浦迥  
沂潁蔡河開  
紅樹迎官舫  
黃花映酒杯  
紀行應俊逸  
覽古定裴徊  
遵陸由梁苑  
馮虛自吹臺  
汲京城屹屹  
艮嶽石嵬嵬  
踏月車鳴鐸

嘶風騎卷埃吳音愴父訝儒服異方猜應為青山住懸  
知白日墮解鞍依近郭縱馬盡枯荻風急徃孤嘯天高  
鴻鴈哀詩情秋共澹鄉夢曉同催喜見烽烟息愁聞驛  
鼓推虎牢悲戰骨緹嶺覓仙胎岳峙嵩高峻河傾水洑  
洄山川猶鞏固風物亦竒佺鷄唱函關啓龍飛秦華來  
碑亭尋漢刻浴殿弔唐灾望極吳天末行循渭水隈別  
家傾菊釀到縣動葭灰多士爭先迓諸生獲後陪獻道  
芹實豆舍菜酒崇畧五傳遺經在三餘萬卷該尊王明

大義抑霸黜渠魁寒榻臯比設朝盤苜蓿堆樹黨思奉  
母援桂念提孩有弟能調饒何郵不寄梅五陵還突兀  
八水自縈回選勝筇扶手遐觀笏拄頰壞基留宿草斷  
礎長荒落異域多佳處茲遊實壯哉丈夫四海志肯使  
寸心摧 汝易表華

咸陽勝槩壓關西渭水清流接泮池博士譚經還重席  
諸生負笈正求師孤雲直望三千里一日思親十二時  
轉首相逢又朱夏槐花開到最高枝 譙郡曹亨

西望咸陽路幾千滿城楊柳帶秋烟江山在處皆新識  
行李隨身只舊氈萬乘已應知姓字一官不久滯才賢  
眼中朋友如君少握手臨岐獨惘然 丹丘吳儁

肅肅新霜草木萎咸陽博士上官時闕開函谷無鷄唱  
地接岐山有鳳儀銜鱸再看來鸛雀橫經底用撤臯比  
壯遊一一皆堪紀大軸題將慰所思 肥水包軫

獨抱遺經出董帷秋風遠騎入關遲用儒幸際千年會  
造士欣為一縣師鴻鴈雲低秦壘角牛羊草沒漢陵碑

宦遊兼得尋遺蹟莫向尊前嘆別離  
渤海高啓

君子慎出處出處道所存親交貴知心知心義彌敦我  
初相逢婁水濱升堂拜親笑語溫如何傾蓋間情好若  
弟昆先生讀書探本根上泝六籍追羲軒竒功汎掃枝  
葉繁落筆肯吐常人言清如壘洗突出衆瓦盆壯如赤  
手下搏滄溟鯤謙撓退避名愈蕃光耀迫脫超塵昏我  
以駑鈍姿而欲接討論邇來鞭策期攀援信知適越須  
南轅朝從暮和箎與塤恨不鄰舍同雞豚綸音日下需

瑤琨蓄材要自黷宮門翩翩一札辭帝閭秦川借問將  
何循三千客路隨車輪西風黃葉天雨塵此情此際誠  
難伸先生勇往力孟賁要翦荆棘栽蘭蓀咸陽未必殊  
河汾乃知君子心出處恥與流俗羣我聞黃河之水來  
崑崙洪波日夜東南奔有源之學固如此豈但觀闕浩氣  
凌浮雲壯哉是行不可諉聖教幸復鳴中原明年花柳  
盈晴川葛巾定下東吳船為君酌酒春風前 陳潛夫  
落葉鳴空山天澹寒雲垂鴻鵠逝長風矯翮將安之歲



華行復晚霜露繁以淒眷惟息私被謂恐程途稽清朝  
急賢才掇揀不或遺善價雖自韞令德難久羈闕輔人  
物數業術在所施渺渺川陸脩依依風日微摻祛祖道  
周愴怛多離思行矣但珍重足慰朋情睽 陳珪

丘壑怡高志朝廷急用賢苦辭羣牧瑞甘就廣文韞韞  
籍涵才地聰明達性天冲襟澄止水行已直於弦淳朴  
咸陽古修明學校傳龍門經只尺驛路涉三千橘園霜  
華早萱堂畫景延送君扶老病目斷孝廉船 銜肅

東書西上咸陽道一望羣山日脚邊  
鴈影秋飛銀漢杳菊花晴映絳幃鮮  
好將舊日春秋學早向升堂弟子傳  
白髮阿婆長憶汝便風莫惜寄歸箋  
沙門曇瑞

諸公總慕黃金綬子獨甘為邑校官  
飲水著書差自樂治民為政亦良難  
入關不憚三千里望岳須經五十盤  
惟有老親違侍養作書時得報平安  
同郡申屠衡

東書來上國典教入西秦  
洒淚空慈母憐才獨故人  
關山迂客路行李犯霜晨  
渭水秋風裏休嗟寂寞濱  
傅

輿

先生典教闕西日小子懷鄉白下時奉母總憐甘旨缺  
問程獨計水雲遲菜盤香輓何須肉行李蕭條只有詩  
莫厭冷官終汨沒斯文此日要扶持 陳永壽夫

遠遊自是男兒志特立正當強仕年衣上密縫慈母線  
擔頭輕束廣文羶春秋三傳繼絕學畢郢諸生得盛傳  
老我也須飛夢去振衣同陟華山顛 毘陵謝應芳

三千里外咸陽縣官冷那堪路更遥道上風霜須與避

客邊眠食政難調，慈親奉養無煩慮。幼子提撕不使嬌，頻寫平安書寄取。脊令風急尾蕭蕭，弟璧再拜上。

家本華亭宋宦門，大父東倉初北徙。先君紹以德業優，隱約里閭仍不仕。積善世久久必昌，人謂當鍾我兄弟。大兄早歲事名師，春秋五傳窮微理。旁搜羣籍求道真，閉戶終年講經史。不知聞達有可求，棲遲菘室甘耘耔。縣令一朝騰薦書，校室諸生須博士。朝廷此際正貪賢，姓名遂入銓曹裏。大綰金章守列城，小亦青綸為百里。

固辭不怕丞相嗔守賤居卑非所恥尚書手持新例來  
改調咸陽當渭水關西學者喜得師吳東子弟愁失恃  
水陸三千道路長好調飲食娛肢體勿慮庭幃乏奉養  
諸弟還當具甘旨先人墳墓與祠堂魚鱸尚可供祭祀  
故鄉家業不須憂男事詩書女針黹願言明歲早歸來  
白髮慈親向門倚 第九弟箕再拜上

洪武建號之三祀詔立郡縣學官蘇之崑山屢薦其人  
上輒命以朝職今年吾友殷孝伯先生實預茲選天官

既竒其文將置諸有司之列先生以母老辭遂得教諭  
咸陽齊郡張先生既為序道學之絕續詳且悉矣余不  
愧荒陋謹賦五言一篇用抒故舊之情云爾

吾友子殷子弱歲不好弄樓居罕踰戶矩步那可縱黃  
卷對聖賢車馬徒倥傯先達恒造請俗士絕迎送洒然  
脫凡近明體以適用惟六經根柢沉百氏錯綜尋源沂  
伊洛師聖比騫贛溫溫崑岡玉翩翩河東鳳黌堂據臯比  
緬素日充棟塋祭貴合宜甘旨資月俸遂令風俗移豈

但州里重守令愧羔鴈剌薦異鄉貢責實名不虛主靜  
時則動奉表趨輦轂馳檄過婁葑造車斯合轍射鵠本  
期中厚祿謝州郡至樂在章縫遠調詎辭難獨見已逾  
衆怡顏別親友脩途越梁宋關山青染衣河漸白流瀕  
商飆攪楸梧涼雨滌塵霽咸陽古畢郢文武實開封皇  
明萬物覩道繼百王統斧鉞夷暴強海寓沸絃誦正氣  
方甄陶學圃勤播種安定蘇湖學朱子白鹿洞儒生得  
依皈論說啓昏瞢芹茅侯國詩首藿庖人供絳帳擁貂

裘革囊斟馬湏公餘暫休沐縱覽迂騎從浩蕩窺八川  
崇臺凌九峻終南梯昌盍清渭梁躑躅遠追長卿遊窮  
鄙步兵慟相思月掛屋轉瞬風解凍尺素儻可齎邊鴻  
不須控平生笑愚拙淡泊寸心共故舊登仕途冠蓋空  
里闕闡道慕指南著書憐覆甕箴砭誰我師歎息感深  
衷範模慎厥脩贈言託規諷展卷比良覲悠悠故鄉夢  
范陽盧熊

送咸陽殷博士南歸叙



世果盡君子歟言與行一致道固足以相識世果未盡君子歟中養不中才養不才人尤不可不識君子余昔南役還宿州會吳中殷先生孝伯將典教于陝之咸陽見其容中充而外瑩粹然如古璧之含白虹於是得以識其貌遂相從西涉數百里聞其論亶亶乎邈伊洛而窮洙泗也於是得以識其言既就職相去僅踰舍既時得一會見而譽之者旦暮至於是得以識其行之無愧於古人今歟接踰二稔矣雖孝伯之心竊亦有以識之

孝伯在咸陽遂蒼蔚以立棟宇主周公孔子于中而序諸生于左右朝夕儀度惟謹暇則幅巾徜徉登故堞以望自終南太白右轉而顧以及九峻嵯峨諸山皆踴躍於嘯詠間又遠尋歷代遺蹟詢問風物無所不盡於是鄉人之識先生者始比比矣適聞先世墓地為潮水所嚙且慮慈闈之禮久曠乃具事狀上之大府尋得告治任將歸而凡識孝伯者相與為詩以送之竊惟皇明有天下聲教所被舉欲為士君子之風況得泚世如孝伯

者處古文武興化之地哉雖然俗尚推敘先王之澤不能不壞於季世之劇故愚常喜道人善冀有以風動鄉曲俾人人睹君子之光以上承國家化民成俗之意固鄙人之一見也孝伯行矣尚計登堂拜母之餘里中賢士大夫將總總焉于時也願借餘論曰秦中不無識者其為賜不既厚矣乎甲寅之秋七月既望西安府儒學

教授頻陽張統謹敘

統字昭季仕  
至吏部尚書

後齋記

子嘗讀淮南子之書而愛其原道之文足以發明老子  
不先之義也其言曰先者難為知而後者易為攻也先  
者後之弓矢質的也猶罇之與刃難犯而罇無患者  
何也以其託於後位也又曰後者非謂其底滯而不發  
凝竭而不流周於數而合於時者也吁淮南子之為此  
言也不知者以為藏智之券要之物勢當然之故也執  
其勢者月不與日而出火必續烟而熖持棊者若鞞索  
之距莫敢先動反之於己若蘧伯玉焉可也伯玉不明

四十九年之非則不明今年之是也殷生奎推魯而好學其受業子門有所獨悟不敢以多上於羣游退然恒若有所不及且名其書室曰後自後者人先之人先情也不知有周於數而合於時者也故予以淮南子之說推而語之生勉之母曰後以甘自後也而先人者莫禦焉生其勉之周於數而合於時則千萬人吾往矣至正十年二月初吉會稽楊維禎說

木齋記

吳下殷生奎天質古茂從予游一言一連醇乎其無偽者也人以木歸之生遂以木名齋令禮部尚書台哈布哈公愛其人為書齋額又求予言誌諸室世之罵推魯不聰者類曰木鄙為棄材亡所於用必多夫不木者曰便曰給曰機曰警不知便給者蒙不仁之具而機警者啓薄行之階也孔子嘗論木矣必與剛毅者同稱曰近仁仁固可以木得之而不可以推魯不聰棄之也夫大味不和大質不雕大樸不散其惟木也乎仁者至朴而無

偽之物也故論仁惟木為近孔子之言豈欺我哉嘻木  
為聖人所器而論者棄之天下之能仁者寡矣抑論者  
之所棄則有矣士之為木有似而實非漢稱長者木之  
近仁者也惟勃最近之而易朴售至姦如周仁之流則大  
似而大非其為不仁甚矣今聖人以深仁洽萬生使民  
剗偽還朴表民者類求長者更若生之木固又今聖人  
之所器而又加之以聖賢之學使言仁者歸生生其不  
應表民之求乎吾聞生之王大父大父累世忠樸如

生所鍾殆出於一家風氣之厚也殷氏四世而未昌其  
當昌在生無疑者故吾叙而期之而又為賦詩一首極  
木之所詣以率能詩者繼之詩曰七日混沌離穿鑿爭  
七竅碩果一失仁百體俱弗肖巧詐日橫生售朴至衣溺  
聖人憂世深世變若原燎安得至木資與世作津橋學  
齋取名木衆巧不同調回愚與參魯入室得道要豈是  
灰槁人滅心比滅爍君不見紀渚雞人方詆木鷄至正  
九年春三月十有三日會稽楊維禎在姑胥書畫舫寫



木齋說

會稽楊鐵崖號其吳下生殷奎讀書之室曰木既誌其  
故又令生持以求長語於雲間陸子陸曰奎西方首宿  
於五行屬木子之名齋豈以是與生曰非是也吾質朴  
人以木詆吾吾曰是善名我鐵崖遂令名吾齋余謂生  
木之類亦至衆而為用亦至廣子所謂木寧偃蹇閱世  
為山中之壽耶將繩墨是從規矩是就耶寧渠渠為干  
仞之夏屋耶將濯濯為牛羊之牧耶寧為不雕之朽腐

耶將從成風之斤斧耶寧刻節梳而文以山藻耶將外  
形骸而凝然如槁耶寧柔而可弦以弧耶將堅而可攻  
以輪耶寧財挺斷閑負廊廟之重耶將不剗不剗遺濟  
川之用耶寧守吾之太樸耶將從匠氏之小椽耶寧為  
馬巖敦之鶩耶將為龍伯高之鵠耶寧不鬪如紀渚氏  
之雞耶將易照以絕穆曜之譏耶寧大其材為工師之  
器耶將聽其斷為溝中之棄耶寧希秘書之府耶將為丘  
壑之全耶此孰得孰失曷凶曷吉凡厥有生萬有不一

或郁而文或朴而質胡子之生為世所誣生為揖而進  
曰吾聞大智若愚大辯若訥譏悟聰譽厥內四逸彼柴  
之愚實厚有餘此參之魯宗道之緒莫大於仁惟木為  
近誰其似之豈弟忠信余不能難書其說以為慰雲間  
陸居仁撰

木齋詩

彼齋居而靜者匪麀株拘之謂也惟木故訥惟朴故野  
參以魯得匪事侈哆開見大意人知者寡曰木伊何譬

柏與松維挺特不撓屈故能傲霜雪歷嚴冬嗟殷大章  
父心古而貌古雖湛然剛毅至文其言焉則殊粲而楚  
楚我知大章其心則仁故雖似乎木強而枝葉郁然而  
春陽人辯已訥人訥已誠較已得失孰短孰長佐饗者  
嘗佐鬪者傷詩以勸木惟木自量遂昌鄭元祐賦

崑岡有石堅如鐵竒壁中藏光奪月鐵邃一聲吹石裂  
透隙虹光吐環玦不學荆人受雙則殷君小齋以木名  
外示朴頓中清明何殊此石多瓊瑛世人肉眼迷端倪

但見礪硯稱文鑿豈識光價連城齊一朝持之獻天子  
珉中玉表真鬱栖吳興知困生錢鼎賦

渾沌二氣分資稟有清濁聰明鍾聖賢魯鈍歸愚樸不  
知愚樸姿聰明實中殼有美殷君子溫醇匪齷齪懷哉  
長者風青年飽經學齋居既名木於義已高卓聖人許  
近仁唯木就矩矱參以魯得之所貴在誠慤子非朽腐餘  
美質加雕斲彬彬後素功於焉達先覺秦溪馬琬賦  
木兮木兮與仁斯近東方震焉惟仁之蘊一眠同仁弗

立畦畛其配以春其端惻隱載萌載蘖遂視既發昉以  
道自彊毋蹈萎荼德煌煌理庚庚燧其英煥天章豫章

盧觀題

殷君方妙齡從師東海湄往者常一見喜子純朴姿百  
好不入心所志唯書詩它人或笑歌子言無繁詞它人  
方娛游子獸如齊尸不知近道流或復憐其癡夫子以  
木名將有遠大期番禺黃季倫賦

木齋銘二首

華亭殷奎大章以木名齋其師鐵崖楊先生既為之記  
又求余言以銘之孔子言剛毅木訥近仁四者質之近  
仁者也夫木者質朴質之朴則守之固而無徇外之  
失有是美質而又加之以學吾知其不至於仁不止也  
銘曰絀縕玄黃聚而為人或澆而華或朴而純澆則易  
失朴乃其至惟質之朴衆善所聚善非外來學則可致  
聖人論學曰後生可畏曰今汝畫學之為貴士當志學  
殫力之強積之既久猶水汪洋彼滴不知日肆而亡故

舉世佻巧去道茫渺舉世澆訛其失孔多朴而能學天  
理流行物我一體其施不窮叶我作銘詩歌詠是資至  
正十年歲在庚寅秋七月日永嘉潛齋老人陳剛書

質之美者醇而不漓或流于薄斯習之移木近於愚亦  
近於魯之二物者聖門所許木強敦厚卒能安劉刻薄  
如錯莫能自謀揚子之門乃有木生太璞不琢實韜其  
英木生寶之幸遇匠手器而名之可使傳後雲間孫華  
元實父題于果育齋



附邗殷處士碣銘 并序

至正廿二年九月癸卯朔十有八日庚申吳郡殷奎葬  
其父雍逸處士之柩于崑山先塋之次既葬樹碣墓道  
而請其師東維叟為之銘處士名庠字君序其先華亭人  
居崑者再世矣崑俗喜貨殖類蓄高資遺子孫處士哂  
曰貨多愚子孫且賈禍何用哉聖賢之學達可比民物  
窮亦善一身勅其子奎不遠數百里從余遊一州皆笑  
以為迂處士不為變益市書築室使卒業余已喜處士

之志果確而奎亦謹厚雅飭刻意古學余於是又善處  
士之願克有遂也始處士少時即以長子任家督弗及  
于學然其天質之美孝友忠信自有絕人者既壯間觀  
古書傳求其人行事施諸家父性嚴處士事之竭力能  
得其懽心遇二弟恩意篤至周人急無所吝雖負之不  
校其葬親弗襲世俗委諸水火君子稱之故其沒也人  
多哭之哀處士享年五十有七士君子誄其行者私謚  
之曰雍逸處士其曾祖萬宋嘉興節制幹官王父澄父

子諱皆抱德不仕娶王氏宣政院宣使忠仁女子四人  
女二人孫男女六人奎其冢子也殷氏三世有德而無  
祿四世而昌意者其在奎乎迺為之銘以俟銘曰生不  
穀叶死不壽德則富叶惟其不有以遺後賜進士出身  
奉訓大夫江西等處儒學提舉楊維禎撰并書

行實

故文懿殷公行狀

盧熊撰

先生諱奎字孝章一字孝伯望出汝南世居吳郡華亭

其祖徙崑山今為蘇州崑山人先生數歲端厚湛默熊  
父夷孝先生深愛之故與熊同受小學其家設邸肆在  
太倉闌市中旦夕挾冊歸舍定省外亦不遑及他事惟  
務讀誦鄰巷罕覩其面既而受易於盛公德瑞其祖父  
柏堂翁乃作樓居儲書其上延良師友與之遊處時會  
稽楊公廉夫自吳城抵崑山一見竒之即席上設弟子  
禮由是從楊公往來錢唐華亭者累年聞見益廣其父  
母具修脯金帛數遣童幹資之又作別業於婁曲買田

益驚書以俟其歸當時以經術文辭名東南者惟楊公  
號傑出然其人率易任真絕去厓異先生業其門不肯  
詭隨出藻麗語一言一動務合榘度楊公愈加愛重以  
父兄命勉應江浙鄉舉一再不利輒澹然無進取意後  
浙東憲僉李木魯昱聞先生名舉主教席亦不起有司  
延致先生訓導儒學先生以侍養便始起應命時知州  
事東平費侯大興橫序表率弟子侯性剛難犯雅敬先  
生侯即明倫堂前立賢守令鄉先生二祠復作龍洲劉

先生祠堂於慧聚寺之東齋先生即割田三十六畝歸之學碑供各祠歲時之祀後知州僕侯荆婁侯廟修治先賢御史王公侍御史李公塚表朱節婦茅氏墓道墓儒士郭翼顧權於馬鞍山之陰皆先生所建白也皇朝改立學法先生與陳君潛夫聯事極力奉行教養有成迄今為七邑倡洪武四年先生舉崑山教諭上吏部試春秋經道統論皆辭深雅奧上官置之高等當是時上銳意開治道痛懲吏弊儒者皆不次進用司舉選者將

例授以郡縣先生懇請願為近地學官以便奉養老母  
拂上官意遂調西安之咸陽又請告還鄉里辭親以往  
先生至咸陽時即白有司夷荆榛畚瓦礫作教室以居  
師弟子躬親教導時咸陽罹兵革久民未知學賴先生  
孳孳不懈文教復行是歲陝西省即以禮聘先生考試  
多士又請纂修關陝諸府圖經書成而病作歸學治醫  
藥尤以禮殿未完力疾襄事將訖功而先生不起矣時  
洪武九年閏九月二十六日也年四十有六祖諱子誼

父諱庠謚雍逸處士母王氏妻常熟陳氏後先生七日  
卒子男二人長駒駘次嗣孺女三人長適朱晟次適林  
宗駟瑟在室熊與先生有連且同年甲以研席之歡如  
親昆弟一時交友如進士會稽丞傅顛等數人耳太倉  
地瀕海世業儒者固鮮慎終之禮尤為鄙陋間有秀俊  
多為吏胥賈販以牟利時人稱賢父兄能教子弟者兩  
家先有盧氏鈞華今揚州教授昭之父及先生之祖之  
父處士君者人取以為法里中庸富人恒竭資以送死



類以土薄不葬而卒委之於水火先生獨墓其祖若父  
一遵棺衾塚壙之制人以為難咸謂殷氏有子矣當承  
平日大夫士嘗即學宮行鄉約及歲時相率講習經史  
以為文會兵興禮廢及先生居學舍旦望休沐必與宿  
儒秀民互為主賓論文稽古如司馬氏真率會約遇人  
有喪病患難必為協衆力資助之東州名士故遂昌鄭  
公元祐永嘉高公明豫章葛公元哲華亭孫公莘同郡  
余君日強今齊郡張公紳深禮敬焉先生以去年南還

省親拜墓與熊攷論關中舊事未幾別去自言我衰病不堪又且遠行奈老母何今年貽書云內傷疾作併屬其子來視我熊緘其手迹抵家嗣是半年不得問比又夢見之意甚不樂嗚呼先生果不起耶友人將作司令王富文告熊以故為之泣然因為位哭之於館舍蓋先生素篤孝行非特以疾遽至於是誠以不獲奉養其親為憂以致殞沒論者謂為死孝先生入關時齊郡張公為論道學之緒自宋中興後恒在東南及許文正公設

教北方當元初混一之際今孝章往關中亦亂平治定之時所以期望先生者如此其重蓋吳中以道學鳴者若王信伯王彥光李彥平王去非魏華甫史蒙卿皆以儒師守帥闡揚程朱之學故先生力欲追蹤先哲以變衰世鄙陋之習其姿稟之高操履之正真有見於致知力行實踐夫孝友忠信考於經籍道術而不事乎記誦辭章全之於身者必欲循於禮措之於事者必欲合其宜造次顛沛而不見其喜愠之容恬澹靖退而不尚於

利之辯處家為孝子飭身為名士典教為良師經明行  
脩謙恭純潔人無間言私謚曰文懿先生孰曰不宜所  
著道學統緒圖家祭儀喪儀崑山志咸陽志關中名勝  
集陝西圖經婁曲叢藁支離稿渭城寢語總若干卷先  
生平昔稱熊為識洽才茂熊深竊愧赧然知先生之深  
者莫熊若也爰掇其景行以俟作銘者表著焉

故咸陽縣儒學教諭文懿殷君墓誌銘

汝易袁華撰

洪武九年閏九月二十有六日咸陽縣儒學教諭長平  
殷君卒于官舍後七日其配陳氏亦卒孤駒駘病不能  
奔越三載仲弟璧徒跣四千餘里閱五甲子以槥櫬還  
將以是年十有二月庚申合墓于先塋其季箕持今知  
兗州盧侯熊所為狀泣拜請銘華與先生同里閉同登  
會稽鐵崖楊公之門而駒駘袁氏壻也故不辭而為之  
銘先生諱奎字孝章一字孝伯姓殷氏其先華亭人曾  
祖諱某祖諱某遷崑山考諱某母王氏先生端厚沈默

童州入鄉校即以穎悟稱時鐵崖公以經術詞章鳴于東南而襟度豁達絕去塵異一見竒之先生從于吳城于華亭于錢唐訢訢惟謹言動必合矩度由是益加愛重曰以木名所居室且為之文先生雅無進取意嘗奉父兄命試有司一再不利泊如也歲丙申州治復崑山越四載己亥有司以太學師聘先生曰侍養便始應命比謁廟以先師曾子既進鄰國封配享于廟矣而故號仍列廡下於禮乖違白于典教者正焉凡邑中褒賢紀

功立祠表墓繫名教者皆先生所建白洪武庚戌春大  
新學制明年以教有成效舉教諭試天官中高等而朝  
廷方眷注於儒不次進用司選者欲擢寘郡縣力以母  
老辭不允故調西安之咸陽咸陽罹兵革久廟學蕩然  
至則芟夷荆榛作室若干楹以居弟子員躬親教養民  
遂知學無何省府聘考多士甲寅歸覲親既返而省府  
修關中諸郡圖經仍董其事恒以母老道遠弗克就養  
抑鬱不獲信因病內傷遂不起矣其入關時以五陵門

候自號及卒知縣莊九疇具棺衾墓咸陽原上竟符其  
言先生篤志古學墓祭務循禮法非甚病手不釋卷故  
攷訂精詳文學淵永邑人以道學鳴者若王公彥光李  
公彥平皆表表者先生力欲追縱以變衰世陋習胡天  
不假之年惜哉盧兗州謂先生處家為孝子飭身為名  
士典教為良師而私謚之曰文懿先生時論咸以為然  
先生生于元至順辛未得年四十有六子男二人長曰  
駒駘次曰嗣孺女三人長適朱晟次適林宗駢曹某所



著有道學統緒圖家祭儀喪儀崑山志咸陽志關中名  
勝集陝西圖經婁曲叢稿支離藁渭城寤語總若干卷

銘曰

行之醇學之正

叶征

孝篤志殞厥生仁者壽茫無徵不亡

者存有立言

叶寧

殷教諭哀辭

有序

豐城余詮

洪武九年閏九月二十六日咸陽教諭殷孝伯卒于學  
舍年四十六聞者莫不哀之去年冬孝伯自秦歸吳省

親拜先塋嘗造子倉卒弗克款奉言笑未幾復入闕又  
失於追餞予心恒悒悒然不知其為永訣也悲夫孝伯  
謹厚嗜學讀書慕知聖人微言大法之歸趣孜孜忘晝  
夜寒暑之變其居家也孝于親友于兄弟宗族鄉黨無  
間言其訓學徒也諄諄不倦期於有成然後已其在咸  
陽也新校室於瓦礫之場振士風於凋敝之後人皆謂  
關西夫子復見今日豈期遽以疾而終於此耶置郵以  
凶問至其家則其妻陳氏亦後孝伯七日卒矣嗚呼哀

哉其子駒駘將匍匐奔赴扶柩以歸又值疾作弗果今  
踰年矣尚旅殯于咸陽千里外嗚呼哀哉豐城余詮與  
孝伯有斯文骨肉之好生無以答其交往之情死不得  
憑其窆以盡其弔哭之道尚忍為辭以哀之然情有不  
能自己者乃為之辭曰

夫有生而必死兮猶寒暑之推遷云積善而有報兮天  
道之信然斯人既有此內美兮天胡不假之以年竟坎  
坷以終身兮志壹鬱而不宣雖觀光於上國兮亦何意

於廣文之羶忤銓曹而辭尊顯兮念茲母以拳拳值遷  
調而遠邁兮致親愛以俱捐俾二豎之肆妖兮曾瞑眩  
不可以少延遽易簣於庠舍兮寄孤櫬於秦川豈定數  
之莫逃兮抑吾道之迭遭記玉樓而不返兮抱麟經而  
誰傳諸生皇皇於館下兮洒涕泗之漣漣朋儕何以質  
疑兮撫臯比而煩帽鯉趨庭而無聞兮鴈斷行而不聯  
親倚閭而白首兮鸞分飛而後先魂杳杳以長夜兮路  
漫漫以修阻渺咸陽於天際兮委婁曲於榛莽況予與

子以久要兮焉能不為之悽愴奠一觴而西望兮遂永訣於終古

祭殷教諭文

洪武九年歲次丙辰閏九月二十八日己酉承事郎知西安府咸陽縣事莊九疇率僚屬耆士等謹以清酌柔毛之奠祭告于故儒學教諭孝伯先生殷公之靈其辭曰於戲惟公績學藝文實出楊門藝天光燄是炙是熏擇言砥行聲譽四聞明朝取士雋拔其羣廷閱甲科有

社有民帝曰非爾實稱儒珍育我英才淑惠後人秦維  
帝宅南渭北嶠咸陽既墟秀傑旋鍾俾振教鐸師表是  
崇帝臣弗違奉職惟恭乃建泮宮有禮有容聿新風化  
俊造景從絃歌既聞鄰壤式宗孰不云樂有隱其恫有  
親垂白子力白井曷能致之關河遠永日存心惟撫躬  
弔影郡侯錫類授檄歸省清風載道沙塵不驚舍車登  
舟望里歡迎叙倫互拜母壽子寧有宅舊宇有植先塋  
以忠養志良副恩榮請急有程乃赴乃職贈言盈裝千

金爾直詔申圖志府憲公辟公出其素按索有績有光  
闕輔遺編奕奕我莅斯邑西賓有席何幸同僚同心同  
德士耆同慶民所矜式朝經暮史鉛槧在持積勞以疾  
魯不告疲友人竺籀裹藥時資時病少愈弱不勝衣祀  
事有請社稷其祈力疾將事肅恭是儀正言正色實為  
我規總戎尚賢資文飭武府史迎門抗詞弗許自揆弗  
堪興拜偃僂齒豁言譎怠佐尊俎頽然即臥氣息如縷  
行旣弗果病亦自處閏月初吉倡我鄉飲友生習儀指

畫在寢迎賓致幣惟公是審僕介有賢肅德凜凜將屆  
之期公疾斯甚胡天奪之亟失我良朋我疑我悔奚考  
奚懲蓋棺則已悲憤填膺咸陽有原纍纍塚陵按圖索誌  
粲若列星宅兆卜吉慰厝神靈執酌傾心俎芳淪清矢  
詞永訣鑒爾精誠於戲哀哉尚享

維洪武十一年歲次戊午九月庚午朔越十有七日丙  
戌承事郎知西安府咸陽縣事莊九疇等謹以清酌庶  
羞之奠祭告于故儒學教諭孝伯先生殷公之靈其辭



曰惟公有言有德顯名儒官自東徂西志亦盤桓樂新  
文教咸陽舊都五陵門候其署自呼泮宮臥病寂寞渭  
濱館名枕流我其古人丙辰秋閏蓋棺則已爰瘞畢原  
闕今三禩靈妥魄安宿草再碧式順爾先諒無我闕銜哀  
有弟誓言歸喪辛勤關河涉厯風霜遷壙滌骨裹以瓊  
車首丘夙志禮無爾渝嗟予同心承乏茲邑斧喪奚資  
瓶羸奚汲翩翩靈旒東向其歸漉觴祖道矢心以詞尚  
享

洪武九年歲次丙辰冬十一月辛巳朔二十四日甲辰  
前平江路治中東平費復初謹以清酌庶羞之奠致祭  
于故咸陽教諭強齋先生殷公之靈曰惟公之學之行  
鄉黨莫先我叨守土爰知子賢賔居庠舍厥聳是傳始  
崑之士詞章是學公始以經開示後覺乾乾日夕寶惜  
分陰以教裨治尤契我心世轉風移十有餘載人異炎  
涼公心不改以為善人當膺後祉云何一疾遽爾不起嗚  
呼哀哉遺孤滿眼母老家貧關山杳杳旅殯于秦果何

謂哉天道茫茫誠不可信尚冀後人無殞厥問烏乎哀哉尚享

洪武十年歲次丁巳正月十有三日壬辰中書舍人盧熊遣男彭祖以肴酒致祭于亡友文懿先生殷公之位其辭曰烏乎先生純粹貞固爰自童年斥絕外慕閉戶下帷耽耆竹素良朋萃止名師早遇瓊瑤待賈華駟騁路聲名籍甚星鳳爭覩一詣鄉闈韜光斂步道遠婁曲戶滿來屨助教學宮守長延譽表揚風節誨化童孺遠近

率從雲奔川赴遵奉明法修飭典故薦書歛起伯樂驚  
顧力辭郡縣寧處韋布西入咸陽名重師傅黌宇聿新  
童冠景附振此絃歌修厥筮籥比坐擁三涉霜露烏  
乎先生渾金璞玉叶不事雕鐫靡藉陶鑄力追先哲纂  
承遺緒孝友介潔綽有餘裕禮葬祖考思洽手足叶握  
手交懽旬日相聚別語丁寧歎息哀暮曾奉報書嬰此  
沈疴如何數月長寐不寤命不少延皇穹難訴熊也鄙  
劣親誼夙著麻植蓬生驥尾蠅附朝遊夕宿尚憶髫髻

涕泗盈襟神喪色沮息黥補劓終莫予助爰修祭奠追思  
燕醜攄辭相哀曷究情素烏乎哀哉尚享

維洪武九年歲次丙辰十月辛亥朔十有九日己巳友  
人袁華陳潛夫曹富朱吉謹以清酌庶羞之奠敬致祭  
于故咸陽教諭強齋先生殷公之靈曰惟公學博而行  
修氣清而質粹藹乎其有文溫乎其有理望之者知為  
有德之士求之崑庠一人而已嗟乎藝貫文場兮寧處  
下位教鐸遙遙兮走四千里雖家貧母在常情為可悲

而主教得人亦斯文之所倚蓋天生人為國之紀則樂  
育之誠固無間於彼此何阨運之復丁遽銜哀於下地  
後進失其師模有識為之短氣顧秦嶺之橫雲栖旅寃  
於渭邸命與時違烏乎已矣雖然孝友一門朋遊以義  
惟純粹而無瑕質幽明而無愧雖失意於一時宜流芳  
於百世華等親舊之情交承之契異姓同心分猶昆弟  
敬致哀於一觴寓虔誠於葑菲竟兮歸來無上下四方  
只烏乎哀哉尚享

維洪武九年歲次丙辰十月辛亥朔十有九日己巳門  
人余燦等謹以清酌庶羞之奠致祭于先師咸陽教諭  
強齋殷公之靈曰嗚乎天生哲人以道為寄云胡不淑  
遽爾不起嗟惟先生鳴道邑里鼓篋如雲敦薄寬鄙潛  
心聖言有用有體世之著龜國之良器遷教咸陽奪此  
與彼婁曲偉人關西夫子木鐸琅琅以教裨治道既淵  
源豈曰小試歸覲慈闈篤孝惟至就養既艱志不克遂  
痛念劬勞言輒流涕哀哀先生以孝而死行通神明俯

仰無愧兩地菁莪痛忍遺棄尚想經帷恍若夢寐淚與  
情俱荼毒無地觴酒豆肩敬致葑菲山川有靈不隔誠  
意敬服師言永矢弗替尚享

挽殷教諭詩

黌舍咸陽喜一新手提教鐸振斯民關山歷覽嗟今古  
圖志增修獨苦辛化鶴仙遊身瘞玉離鸞舞影鏡生塵  
更憐阿母高堂上日夜興哀髮似銀 秦約文仲

尚想辭家遠入秦夢中頻見白頭親半生辛苦留遺稿



萬里荒涼只病身  
弟子有情叔朽骨  
天公無眼困斯人  
嗚呼執友多淪沒  
一奠生芻淚滿巾  
陳潛夫振祖

天馬脫羈情莫已  
忽看墨蹟淚潸然  
三年心泳咸陽月  
萬里魂歸渭水船  
道統至言登史冊  
春秋精義照青編  
先生一代河汾業  
留得淵源起後賢  
張彥信

昭代徵賢大比年  
著書纔畢訃音傳  
鶴歸華表人埋玉  
塵翳粧臺鳳逐仙  
行李尚遺新綵服  
冷官應棄廣文壇  
忍將一掬知心淚  
洒向咸陽客墓前  
孔克讓善夫

朋舊淪亡思過半咸陽博士最堪憐春秋經學承師法  
孝友名門邁古先日瞑闕西千里外魂歸婁曲北堂前  
一朝返葬情斯盡華鶴寥寥月滿天 曹亨長通

一上咸陽不復還先生雅志益堪憐北堂親老含餘恨  
西狩經殘孰與傳千里旅魂孤耿耿半生名教獨拳拳  
哲人萎矣斯文係莫恠臨風淚滿前 朱吉季寧

天賦淵源學行精斯文無賴哲人傾婁江水咽西風冷  
秦嶺雲橫夜月明阿母倚門垂鶴髮門生抱道泣麟經

為歌楚些招魂處千里靈車幾日程  
陸平公載

已矣殷文懿由來學行優士評先月旦書法老春秋醇  
酒心俱醉明珠價莫酬修文從地下空憶舊風流

嗷彼斯人逝天胡不假年還鄉惟旅櫬載道有遺編雲  
斷千山外天低一鴈前難兄有難弟大墓得歸全 易

恒九成

黯黯藏舟夜壑移先生遺我又何之忍聞渭水來丹旒  
驚報唐賢失紫芝露冷庭萱情易老天清鶴唳苦歸遲

自慙莫負侯芭土一讀遺編一淚垂 門人余熯茂本  
憶昔羈旅中片言識駿蔑十載忘年交兵戈正騷屑隱  
居事親孝知子志卓越春秋參五傳湮微必搜抉適當  
陵谷變遵養樂岩穴修辭去浮藻矩步踵先哲大明更  
化初鋒車聘高潔辭榮忤當路一命萬里轍志違烏鳥  
養淚忍杜鵑血咸陽方燼餘教雨被綿蕝奐輪周孔廟  
駿奔豆籩設庭階生瑞草書帶青可擷孤雲日在望縮  
地恨無訣遄歸一覲省亟去兩踰月老夫獲晤語清風

濯煩熱著書固已多討論心愈切安知三疊歌竟作干  
古別招魂賴遺孤魂返妻垂絕於乎世之人天賦何優  
劣或厭飫八珍子獨茹冰雪或穩步康莊子獨蹊阨陞  
行行止於斯天視豈荒惚崑山雲氣慘婁江水聲咽誰  
為有道碑修名罔磨滅 毗陵謝應芳子蘭

試藝天官連上台咸陽縣裏講堂開春秋久擅專門學  
梁木俄驚一旦摧龍劍芒寒歸寶匣鳳笙聲斷隔瑤臺  
銘旌早晚還鄉土白髮慈親淚滿腮 范立中立

典教那知老向秦秦中無日不思親江山萬里牽歸夢  
風雨孤燈照客身可歎遺文稱絕筆最憐後學失端人  
百年風采誠難忘猶想當時戴葛巾

訂書一道出西秦愁殺天涯七十親薄宦未能酬素志  
儒冠已信誤間身一生孝友貽孫子千古文章屬後人  
獨有畫圖遺像在每來揮淚拜衣巾 門人朱晟

強齋集卷十